



Preschenta a l'exposiziun è er la Viafier retica.



Emprendists da mazlers mancan intgins en noss chantun.



Per via cun l'ami da l'avegnir, il roboter.



Ortulan ed ortulanas han er in stan en la halla da la citad a Cuira.



In mat è vidlonder cun ina construziun da metal.

FOTOS G.N. STGIER

Gia ier bler moviment

Cuira: Exposiziun Fiutscher

DA GION NUTEGN STGIER / ANR

Ier ha l'exposiziun professiunala grischuna avert per la tschintgavla giada sias portas. Fin dumengia vegnan bunamain 3500 scolaras e scolars da las classas superiuras a visitar l'occurranza en la halla da la citad da Cuira. Giuvenils ston sa decider baud en tge direziun che lur vita professiunala duai ir sunter la scola superiura. La purschida da professiuns, quella è fitg vasta ed er fitg gronda. L'exposiziun Fiutscher è in bun agid per mats e mattas ch'èn anc indecis tge emprendissadi far. Ina buna part dals giuvenils va vinavant a scola, però cunzunt l'economia è er ferm dependenta da bunas forzas manualas e da mats e mattas che fan in emprendissadi da mastergnant. Be cun teoretichers na flurescha l'economia betg, na, ella dovra er praticists e praticistas.

Sustegn da tuttas varts

Ier ha entschet l'exposiziun professiunala 2018, organisada da l'Uniuon grischuna d'artisanadi e mastergn cun *Monika Losa* che fa part dal comité d'organisaiziun. President da quel gremi è *Rico Cioccarelli*, el ch'ha er adina ina funcziun impurtanta tar la concurranza naziunala Swiss Skills ch'ha gi lieu quest onn a Berna. Er tar las maestranzas mundialas da professiun è l'um da Tusaun adina fitg activ sco manader da la delegaziun svizra. Sustegnida vegn l'occurranza Fiutscher

er dal chantun, da numerusas associaziuns professiunalas e da blers patruns.

Passa 300 professiuns

Fin dumengia, ils 18 da november 2018 vegnan preschentadas passa 300 professiuns e purschidas da furnaziun supplementara a numerus stans en la halla da la citad. Ils visitaders han la chaschun da guardar als emprendists sur la givella e da far in discurs cun quels. I vegn er lavurà al lieu, ils scolars e las scolaras dastgan collavurar e sa participar a pliras concurranzas. Ils giuvenils han er la pussaivladad da sentir ils materials e da tutgar els. Ils bunamain 80 expositurs mussan en



Questa matta vul eventualmain daventar ina giada cusunza.

pled, tun e maletg las numerusas professiuns ed els stattan er a disposiziun per dumondas ed ulteriuras exposiziuns. Fin dumengia proxima vegnan spetgads millis scolars e scolaras e persunas d'instrucziun dal stgalm superiur da tut las regiuns dal Grischun. L'ediziun 2016 da l'exposiziun Fiutscher ha attratg radund 13000 visitaders. Er quest onn vegnan spetgads tants visitaders e quai da tut las vegliadetgnas.

La qualitat ha prioritad

Cioccarelli ha ditg che l'exposiziun saja dapi l'emprima ediziun adina vegnida pli gronda e quai saja er quest onn tar la tschintgavla ediziun il cas. Prioritad haja dentant la qualitat, ella che saja il criteri principal per ils organisaturs. La finamira saja d'optimar d'exposiziun tar exposiziun la purschida e lura er da guardar d'esser qualitativ à jour, punctuescha Cioccarelli. La fin d'emna stattan guidas sin il program e quai gist en set linguas. La dumengia bainbaud vegnan undrads ils mats e las mattas da noss chantun ch'han fatg tar ils Swiss Skills a Berna medaglias. Da la partida èn lura er persunas da la politica communal, chantunala e naziunala. In di avant ha lura lieu la revista da moda cum vistgadira da tut las professiuns. L'entschatta da l'exposiziun Fiutscher è stada fitg buna cun visitar ier ina rotscha classas l'occurranza e chaschunar per bler moviment en la halla da la citad ed er enturn quella.



Autos dastgan segir na mancar tar in'exposiziun da professiuns.